

GAY CORRA A CANTA NA WIMCO SAN NICOLAS

Edificio y tur articulo a bay perdi

ORANJESTAD(AAN)— Ayera merdia pa mas o menos 12.15 or Wimco na San Nicolas a pega na candela. Ora cu polis di San Nicolas a yega na e establecimiento nan a nota cu ya candela a expande.

Alarm Centrale a ser notifica y inmediatamente trucknan di cuerpo di bomberonan a sali pa bay domina e candela.

Bao direccion di Sr. Donata a cuminsa combati e incendio, mientras cu for di Lago tambe, e miembronan di e cuerpo di bombero di Lago a instala nan equiponan den cura di Lago y a yuda combati e candela for di eynan, ya cu ta cerca di e edificio di Wimco.

Na dado momento e dak di Wimco a basha den otro, y esaki ta un indicacion caba con fuerte e incendio aki tabata.

Liberty Store cu ta keda banda di e edificio di Wimco a ser muha constantemente pa evita cu e candela lo expande y sende esaki, y por bisa cu

ta un bon trabao a ser haci aki pa evita cu e edificio aki a sufri daño.

Den piso ariba di Liberty Store tin un familia ta biba y un pareha tabata sufri quebrante di salud ey nan tambe.

Nan a ser saca di eynan y hiba otro caminda, mientras cu dos cacho pekines di e familia a ser rescata pa personal di cuerpo di bombero.

Varios miembro di Brandweer cu tabata tin liber na e momentonan di e candela a acudi na e sitio pa yuda combati e candela y mas o menos un ora despues cu informe a drenta, e candela tabata domina caba y a cuminsa cu nablussen.

Manager di Wimco, Sr. Luis Odor cu tabata na e sitio tambe a splica cu el a sali di e edificio mas o menos 12 or y na e momentonan ey no a nota nada straño. Bayendo cas den su auto, el a tende na radio cu Wimco ta na candela.

Segun informacionnan, e candela lo a tuma lugar



despues di un explosion, pero no ta conoci ta kico

por a causa esaki ya cu ora e empleadonan a sali

di e edificio pa bay cas merdia tur cos tabata normal. Hendenan na e

sitio a comenta cu e candela tabata sali for di mei mei di e negoshi. Tanto e edificio como articulonnan cu tabata tin den dje a bay perdi. E empresa ta

sigura si contra candela. Ayera no por a calcula mes ora tampoco cuanto e daño cu a ser causa lo tabata. Tabata gracias na e bon trabao cu a ser haci di Cuerpo di bombero y esun di Lago cu e edificacion denvecindario a scapa.

DEBE NA LRD REDUCI

ORANJESTAD(AAN)— Segun diputado van der Kuyp, a yega na un areglo cu ministro di comunicacion Ing. Roland Lacle ariba e tarifa di yamadan interinsular cu Landsradio Dienst.

Aruba tabata haya antes 15 cent pa minuut, locual a ser aumenta pa 31 cent despues. Tele-

foondienst di Aruba no tabata mucho satisfecho cu esaki sinembargo.

Den e negociacionnan cu a tuma lugar recientemente a keda fiha cu Aruba ta haya 45 cent y door di e areglo aki Aruba a logra reduci e debe cu e tabata tin cu LandsradioDienst cu 10 millon florin

ACCION DI SINDICATONAN SIN INCIDENTE

ORANJESTAD(AAN)—

Segun por a tende di sin-

dicalistanan ayera, e ac-

cion di 3 ora cu sindicatonan di gobierno a tene tabata tin su efecto y ta masha satisfactorio pa esnan involvi.

E accion tabata for di 7 or pa 10 or mainta y despues di a reuni na IO—WUA Recreation Center, a sali cu un parada di auto basta grandi, den cayan.

Na schoolnan por a nota cu na mayoria di schoolnan tabata tin maestronan presente kendenan no ta miembro di sindicato y otronan cu si ta miembro di sindicato pero cu no a forma parti di e accion.

Tabata wordo comenta ayera cu di gobierno, 90 por ciento di e departamentonan grandi tabata

den accion, pero di schoolnan sigur no por bisa asina ya cu e porcentahe aki mester ta hopi mas abao.

Ayera mes e sindicatonan a tene reunion di evaluacion y despues reunion den nan seno ariba e accion aki y posibel otro accionnan.

No tabata tin ningun incidente durante e accionnan di e diferente departamentonan di gobierno y di maestro y maestranan di school.

Fuera di esnan den accion, y na gobierno y na schoolnan, den comunidad mes no a nota nada di e accion aki. Solamente e pitamento di e autonnan den parada a muestra cu tin algo.



Esaki ta momento cu e centenares di auto di huelgistanan ayera mainta tabata pasando dilanti Bestuurskantor bau di pitamento, despues di e reunion cu a ser teni na IO—WUA Recreation Center durante e oranan di accion.